

## REGIONAL NEWS

HEADLINES:-

1. Mizoram Lok Sabha inthlan April ni 19-a vote thlak turah vawiin khan MNF, Congress leh BJP Candidate te'n chuh turin hming an pe lut.
2. Chakma Autonomous District Council sorkarah Parva bialtu MDC, Mohan Chakma chu Chairman atan chuhtu awm lovin vawiin khan tlinga puan a ni.
3. Lok Sabha inthlan thawhkhatna chuh tumte tana hming thehluk hun chu vawiin khan a tawp.
4. Army Commanders' Conference 2024 chu vawiin atangin New Delhi-ah tan a ni.

&lt;&gt;&lt;&gt;&lt;&gt;

MNF, CONG. & BJP CANDIDATES FILES NOMINATION

Mizoram Lok Sabha inthlan April ni 19-a vote thlak turah vawiin khan Mizo National Front (MNF) Candidate Pu K. Vanlalvena, Congress Candidate Pu Lalbiakzama leh BJP Candidate Pu Vanlalhmuaka te'n chuh turin hming an pe lut.

Vawiin hi Candidate-te nomination theh luh hun tawp ni a ni a; ZPM Candidate Richard Vanlalmangaiha, PC Party Candidate Pi Rita Malsawmi leh Independent Candidate Pu Lalhriatrenga Chhangte ten hming an lo pe lut tawh a ni.

Nomination file zawhah chanchinbu mite zawhna chhangin MNF Candidate Pu K. Vanlalvena chuan ram, hnam leh sakhua a him theihna turin nasa zawka tan lak a tum dawn thu a sawi a. Tun parliament kal mekah a chung leh pawnah nasa taka au a tul avangin hetiang a thei tur hian Lok Sabha MP seat chu a chuh a ni, a ti a. Rajya Sabha MP a nih laia a hnathawh en chungin Mizoram mipuiten vote thlak se a duh tih sawiin Mizoram mamawh chhanna ni dawna a inhriat vangin a ding chhuak tih a sawi.

NDA lama a thut tur chungchang sawiin Pu K. Vanlalvena chuan hei hian Mizo mipuitea vote an zawna kawngah nghawng a neih a rin loh thu a sawi a. NDA lam thu tur BJP President Pu Vanlalhmuaka pawh a hranin an ding ve tho tih sawiin NDA chu party 45 inzawmkhawm an ni, a ti a. Kristian state Nagaland leh Meghalaya-ah NDA thawhpui an sawrkar mek tih sawiin NDA chung ngeiah BJP thil tha lo tih duh lotu tam tak an awm a ti a; pawn lam atanga do aia chung lam atanga do a tha zawk tih hrechiantu a ni tih a sawi baw.

Congress Candidate Pu Lalbiakzama chuan sakhaw zalenna bo ta leh hnam hnufual leh tenau zawkte palzutna tam lutuk tibo tura hmalak a tum thu a sawi a; Party ang pawhin an beiseina a sang hle tih sawiin BJP-in UCC pass an tum chu Mizoram tan a him lo a, India khua leh tui zang zawng an intluktlan nan theihtawpa bei turin a ding chhuak a ni, a ti.

BJP MP Candidate Pu Vanlalhmuaka chuan kumin Lok Sabha MP inthlanpuia BJP Mizoram thupui chu 'a hmasa berah Mizoram' a ni, a ti a. Hmarchhak state 7 zinga state 4 te chuan Central Minister an nei tawh a. Mizoram, Meghalaya leh Nagaland chu a nei lo an nih avangin Mizoram BJP MP a nei a nih chuan Cabinet Minister a nih theih thu a sawi a. MP-a thlan tlin a nih chuan hmasawna chu Mizoram chungah mamawh a nihna anga pek a nih tur thu te, BJP-ah duhsak bik awm lovin state mamawh ang zela hmasawna pek thin a ni, a ti a. NDA-ah pahnih thru an awm loh bakah BJP chu NDA neitu a ni a, BJP Mizoram awmchhan chu Mizo hnam leh sakhua himna atan a ni, a ti.

&lt;&gt;&lt;&gt;&lt;&gt;

## MJA SIAHA & MCHP HQRS

Siaha MJA hruaitu Aizawla cham mekte chuan Mizoram sorkar dawra kal MCHP Hqrs. hruaitute nizan khan Aizawl Zotlang veng a Mara House-ah an kawm a, hriselna leh dam lo enkawl kawnga an an District mamawh hrang hrang Health Minister hnena an thlen chungchanga Minister-in a lo chhan dan te an ngaithla.

MCHP Hqrs. President Pi P.Chaki chuan Health Minister chu Siaha mipui leh pawl hrang hrang aiawha hmu an nih thu leh an harsatna chiang taka an hrilh thu sawiin an thu thlen te chu Minister pawhin a lo ngai pawimawh tak zet a, Director râwn nghalin Hnimhlum Doctor indaihlohna nasa tak karah hmanhmawh taka thla ruk chung tal dah rih tura ruahmanna siampui turin thu a râwn nghal a, an beiseina a sang a ni, a ti. Ram tana an thawhna kawngah MJA te tawimawmna an dawn zawng zawngah lawmthu an sawi nghal bawk.

MJA Siaha hruaitute hian Siaha District Hospital-a hnimhlum Doctor an neih loh vanga Siaha District mipui ten harsatna nasa tak an tawk mek leh nau nei tur inzai ringawt pawh a tih theih tak loh avanga mi harsa leh rethei zawk ten nasa taka an tuar mek chu veiawm an tih takzet thu an sawi a ni.

<><><>

### NEW CADC CHAIRMAN

Chakma Autonomous District Council (CADC) sorkarah Parva bialtu MDC, Mohan Chakma chu Chairman atan chuhtu awm lovin vawiin khan tlinga puan a ni.

CADC Chairman hmun hi nikum December ni 15-a Chairman ni lai Kali Kumar Tongchangya-a a ban avangin a ruak a. Governor-in CADC Chairman thlan a tul thu hi tun thla ni 21 khan a puang a, hemi bawhzui hian CADC Dy. Chairman-in inthlan huh tumte tana hming pek luh hun te puangin hun hawn chung hian Parva bialtu Mohan Chakma bak hming pe lut an awm loh avangin vawiin khan tlinga puan a ni ta a ni.

Thlan tlin a nih hnua a thu sawiah CADC Chairman thar chuan house leader leh member-te chungah lawmthu a sawi a. Tuna Executive Committee a rin tawk thu leh House kaihhruai kawngah thu lai la taka thil a tih tur thu a sawi a ni.

House leader CADC CEM leh MLA ni kawp Rasik Mohan Chakma chuaun Chairman thar a lawmpui thu leh House rorel kaihhruai kawnga a dinhmun pawimawh zia te a sawi a ni.

<><><>

### MZP ON MPSC

Mizoram Public Service Commission (MPSC)-in kumin February ni 1-a result a tihchhuah tak Combined Competitive Examinations kalpui danah thil fel tawk lo leh chhui chian ngai thil a awma an hriat MZP in an sawi.

Hemi chungchang hi vawiin khan thuchhuah siama sawiin MZP chuan, Mizoram-a hna sang leh zahawm tak tak latu MPSC chhûngah hetiang thil hriat tur a awm hi pawl an ti takzet, an ti a. Mizorama hna sang leh zahawm tak takte lak hna, MPSC-in rintlak taka rei tak a kalpui chu lawmawm an tih thu sawiin MZP chuan, thalai hna zawng mekte pawhin an ringtawk hle thin a. Hetih lai hian Combined Competitive Examination kalpui hnunung berah dik tawk lova hmalakna awm a ngeia a hria chu an ngai thutak hle, an ti a. Ngunthluk zawka zir chianga MPSC chu thalai hna zawng mekten an rin ngam zel theihna turin a tawp thlengin hma an la zel dawn, an ti.

MZP chuan tun hnaiah NIT Mizoram Asst. Registrar leh AMC hnuaia hna lakah a buaipuituten an laina hnai duhsak zawngte thun an tum avangin hma an la tih an thuchhuahah chuan tarlangin he ti ang thil MPSC-a a lo awm ve leh zel chu pawl an ti takzet a ni, an ti.

<><><>

## STATE MEDIA CELL FOR LOK SABHA GENERAL ELECTION, 2024

Thla thar April ni 19-a Lok Sabha inthlanpui vote thlak hunah vote tla a tam theih nana hmalak dan tur sawihona State Media Cell for Lok Sabha General Election, 2024 chuan vawiin khan DIPR Conference Hall, Lianchhiari Run-ah inrawnkhawmna hun a buatsaih a. Kohhran hrang hrang thalai hruaitute, Tlawmngai Pawl hrang hrang hruaitute, Mizo Zirlai Pawl hruaitute bakah hnam bil zirlai pawl hrang hrang aiawhte an tel.

Inrawnkhawmna hun hi Mizoram Addl. Chief Electoral Officer, Dr. H. Lianzela'n a kaihruai a. Mizoramah chuan Lok Sabha MP thlanna aiin MLA thlannaah vote tla a tam sang fal hle thin tih sawiin, MLA thlannaah India rama vote thlak tha ber te zinga mi a nih laiin a hnu lawk thla 4 vel leka Lok Sabha MP thlanah ram puma vote tla chawhrual Mizoramin a pha thei ngai meuh lo va, mipuite a bikin thalaite zingah vote tla a that lehzuat theih nan mi tin tanho a tul a, hemi tur hian eng tiangin nge hma lakho a thawhho a nih theih ang tih sawihona hun an ruahman tih a sawi a ni.

He hunah hian Deputy Chief Electoral Officer Pu Henry C. Lalrawnkima leh Addl SP (Crime), Pu Zonun Sanga ten inthlanpui neih tawha Mizoram dinhmun tlangpui leh Dan leh hrai zawm tur pawimawhte an sawifiah a. Hemi hnu hian Addl. CEO kaihhruaina hnuaiyah sawiho a ni a; rawtna leh ngaihdan pawimawh tak tak te sawiho a ni a, sawihona êng atang hian hmalakna thar duan tum a ni.

Vawiin sawihona hunah hian Mizoram Upa Pawl, Central YMA, Central KTP, Mizoram Thalai Kristian Pawl, Salvation Army Youth, North-East PYD, Mizoram PYD, Adventist Youth Ministries (SDA), Diocese Catholic Thalai Pawl, Mizo Zirlai Pawl, Siamsinpawlp (Paite Zirlai Pawl), Hmar Students Association, Mizoram Bawm Students Association, Lai Students Association, Mara Students Organisation, Pang Zirlai Pawl, Central Young Chakma Association leh Bru Students Association aiawhte an tel.

<><><>

## CHAMPHAI DDMA REFRESHER

District Disaster Management Authority (DDMA), Champhai District bul tumin vawiin khan chhiatrupna thlen thulha che chhuak thei tura din, Quick Response Team (QRT) te tan intuaitharna hun buatsaih a ni.

He hun hmanpuitu District Bawrhaps Pu James Lalrinchhana chuan District Disaster Management Authority-in rikrum thila chhiatna thleng thinte laka lo invenlawk leh chhiatrupna lo thlen thulha chet lak dan turte ngun taka ngaihtuahin hma a lak thin thu a sawi a. Champhai District-a QRT member thalai 100 te tan training buatsaih a lo nih tawh thu leh an tana intuaitharna buatsaih a ni leh thei chu lawmawm a tih thu a sawi a, hei hian inpekna zau zawk leh inzirtharna hlawk tak a pek ngei a beisei a thu a sawi a. QRT Team member thalai kalkhawmte chu taksa leh rilru hriselna ngai pawimawh tur leh ruihhlo laka fihlim tum turin a chah a. Midangte tana inngahna tlak an nih theih nan theihtawp chhuaha training kaltlanga zirtirnate ngun taka ngaithla turin a fuih a ni.

DC Office Complex-a hun hmannah hian Sub-Hqrs YMA Champhai President Pu F. Lalrinmuana'n thu sawiin, Pu VL Bela, President, MEFCOF, Mizoram & Working President, Indian Society on Tobacco and Health, Mizoram-in 'Ramngaw leh Nungcha humhalh' tih leh 'Zuk leh hmuam chungchang' tih thupui hmangin zirtirna a pe a. SVEEP Nodal Officer, Dr. Vanlalnunpuii Ralte in inthlan kaihhnawih hriat tur pawimawhte a sawifiah a. Chawhnu lamah Pu VL. Hruaimawia, DO, DM&R Champhai District-in chhiatrupna thlen thulha chetlakna hmanruate leh a hman dan te a sawifiah a. Hemi hnu hian Keilunglah Tuikhuaha tui tla an awm thulha chhar dan tur zir a ni.

<><><>

## LOK SABHA

Lok Sabha inthlan thawhkhatna chuh tumte tana hming thehluh hun chu vawiin khan a tawp. Hetihlai hian Bihar ah chuan naktuk hi a tawp ni a ni ang. Inthlan thawhkhatnaah hian Lok Sabha seat 102 ah inthlan a ni dawn a. State 17 leh Union Territories pali ah vote thlak a ni dawn a. Heng zingah hian Tamil Nadu-ah 39, Rajasthan ah 12, Uttar Pradesh ah 8, Madhya Pradesh ah 6, Uttarakhand, Assam leh Maharastra ah 5 theuh, Bihar ah 4, West Bengal ah 3, Arunachal Pradesh, Manipur, Meghalaya ah 2 theuh leh Chhatisgarh, Mizoram, Nagaland, Sikkim, Tripura, Andaman and Nicobar Islands, Jammu and Kashmir, Lakshadweep leh Puducherry ah pakhate theuhte an tel.

Naktukah nomination thehluhte hi endik a ni ang a, inhnukdawk duh tan tun thla ni 30 thleng hun hawn a ni ang. Puan tawh angin thlaleh April ni 19 ah vote thlak a ni ang.

Hetihlai hian Lok Sabha inthlan thawhnhina atana hriattirna hi naktukah tihchhuah a ni ang.

<><><>

## ARMY COMMANDERS' CONFERENCE

Army Commanders' Conference 2024 chu vawiin atangin New Delhi-ah tan a ni. He Conference hi Defence Minister Rajnath Singha'n a hmanpui a. Ramchhung hmun hrang hrang atangin sipai officer an kalkhawm dawn a ni.

Vawiin a bul tannaah Chief of Army Staff General Manoj Pande chuan Army Commander te hi Command Headquarter atangin a kawm a. Ramchhunga sipaite kaihnawih leh sipai bangte hamthatna hrang hrangte an sawi ho ang.

<><><>